


MINGGU PRAPASKA KE-5,
3 APRIL 2022

Agama untuk Cintakasih atau Kekejaman?



Di sisi lain, ketika hati kita benar-benar terbuka untuk suatu persekutuan universal, tidak ada sesuatu atau seorang pun yang dikecualikan dari persaudaraan ini. Oleh kerana itu, benar juga ketidakpedulian atau kekejaman terhadap makhluk lain di dunia ini cepat atau lambat akan mempengaruhi perlakuan kita terhadap manusia lain. Kita memiliki hanya satu hati, dan kemalangan yang sama yang membawa kita kepada tindakan kekerasan terhadap binatang, akan segera nyata juga dalam hubungan kita dengan sesama manusia. Setiap kekejaman terhadap makhluk apa pun “bertentangan dengan martabat manusia”. Kita tidak dapat beranggapan bahawa kita sudah banyak mengasihi, jika sebahagian realiti kita diabaikan dari perhatian kita: “Perdamaian, keadilan dan pemeliharaan ciptaan adalah tiga tema yang benar-benar terkait, yang tidak dapat dipisahkan dan diperlakukan secara tersendiri tanpa sekali lagi jatuh ke dalam pengurangan”. Semuanya terhubung; sebagai manusia, kita semua bersatu sebagai saudara dan saudari dalam suatu ziarah yang mengagumkan, terjalin oleh kasih yang Allah tunjukkan bagi setiap makhluk-Nya dan yang dengan kasih sayang yang lembut menyatukan kita juga dengan saudara matahari, saudari bulan, saudara air dan ibu bumi.

Laudato Si' #92

Luangkan masa untuk mempertimbangkan apa paling penting dalam agama untuk kita, dan dalam kes ini, sebagai seorang Katolik. Kita mungkin memandang agama sebagai sebuah institusi sehingga kita lupa memahami erti kehidupan pengikut Yesus. Menjadi seorang Kristian bermakna kita percaya dan memeluk Tuhan Allah dalam kehidupan kita. Ia adalah cara hidup yang dibina

atas kasih sayang, di mana kita berkembang sebagai anak-anak Tuhan Allah.

INJIL – YOHANES 8:1-11

'Sesiapa di kalangan kamu yang tidak berdosa boleh melemparkan batu pertama untuk merejam dia'

Kemudian semua orang pulang ke rumah, tetapi Yesus pergi ke Bukit Zaitun. Keesokan harinya, pagi-pagi sekali Dia pergi ke Rumah Tuhan dan semua orang di situ datang kepada-Nya. Dia duduk lalu mula mengajar mereka. Sementara itu guru Taurat dan orang Farisi membawa seorang wanita kepada Yesus. Wanita itu didapati berzina. Mereka menyuruh wanita itu berdiri di hadapan semua orang, lalu berkata kepada Yesus, "Guru, wanita ini tertangkap basah ketika berzina. Di dalam kitab Taurat, Musa memerintahkan agar wanita seperti ini direjam sehingga mati. Tetapi apakah pendapat guru?" Mereka bertanya demikian kerana hendak memerangkap Yesus, supaya mereka boleh menuduh Dia. Tetapi Yesus menunduk dan menulis di tanah dengan jari-Nya. Mereka terus-menerus bertanya kepadanya. Oleh itu Yesus meluruskan badan-Nya dan berkata kepada mereka, "Sesiapa di kalangan kamu yang tidak berdosa boleh melemparkan batu pertama untuk merejam dia." Setelah itu Yesus menunduk semula dan menulis lagi di atas tanah. Apabila mereka mendengar Yesus berkata demikian, seorang demi seorang, mulai daripada yang tertua, meninggalkan tempat itu. Akhirnya hanya Yesus dan wanita yang masih berdiri itu ada di sana. Yesus meluruskan badan-Nya lalu berkata kepada wanita itu, "Di manakah mereka? Tidak adakah orang yang menghukum kamu?"

"Tidak ada, tuan," jawabnya.

“Baiklah,” kata Yesus, “Aku pun tidak menghukum kamu. Pergilah dan janganlah berdosa lagi.”

RENUNGAN

1 Yohanes 4:7-8 mengandungi satu daripada petikan yang paling penting dalam alkitab untuk kehidupan Kristian kita. Yohanes dengan indahnya memberitahu kita, “Sahabat-sahabat yang aku kasihi, marilah kita saling mengasihi kerana kasih berasal daripada Allah. Sesiapa yang mengasihi, mengenal Allah dan dia anak Allah. Sesiapa yang tidak mengasihi orang lain, tidak mengenal Allah kerana Allah itu kasih.” Ibu Teresa telah berkongsi, “Kita tidak mampu melakukan perkara besar, hanya perkara-perkara kecil dengan kasih yang besar.”

Para pemimpin agama tidak pedulikan hukum Allah, maknanya, dan tujuannya. Mereka nampaknya tidak dibimbing oleh soalan, “apakah tindakan kasih terbesar yang mereka boleh lakukan untuk wanita ini?” Mereka hanya mahu memerangkap Yesus, dan mereka menggunakan wanita yang mereka tangkap itu untuk melakukannya. Dengan cara mereka ini, para pemimpin agama itu menggunakan agama sebagai senjata untuk menyerang Yesus dan sebagai alasan yang kuat untuk merejam wanita itu dengan batu hingga mati.

Pada minggu ini, marilah kita bertanyakan diri kita apakah maknanya bagi kita, menghidupi kehidupan sebagai seorang yang telah menerima Yesus. Kemudian marilah kita mempertimbangkan hal ini berhubungan sesetengah sikap kita di dalam perhubungan dengan orang lain.

LATIHAN PRAPASKA

Minggu ini, marilah kita pertimbangkan sikap-sikap kekejaman. Ada kemungkinan bahawa mengikuti Yesus diterjemahkan kepada sikap: "Saya lebih baik daripada anda". Adakah ini matlamat dan maknanya mengikuti Yesus? Soalan-soalan yang kita boleh tanyakan pada diri kita minggu ini adalah: Adakah kita menggunakan iman dan kepercayaan kita sebagai senjata untuk menyerang orang lain? Maknanya, adakah kita telah menggunakan doa untuk menghina atau menunjukkan kesalahan orang lain? Adakah kita telah memalukan orang lain kerana kita tidak nampak mereka berdoa atau meluangkan masa di Gereja? Adakah kita menggunakan doa sebagai sebahagian daripada ketegangan dan perasaan yang belum diselesaikan?

PENDIRIAN SAYA

- Saya akan berhenti menggunakan Allah dan iman saya untuk memalukan orang lain, menakutkan mereka atau membuatkan mereka merasa bersalah.
- Saya akan memberi kesaksian kepada Allah cintakasih dan belaskasih melalui cara kehidupan saya (seperti yang dilakukan oleh Ibu Teresa).
- Saya tidak akan berlaku kejam terhadap binatang.

TINDAKAN KONKRIT

Siapa yang (kita/saya) doakan? Adakah kita berdoa untuk ibubapa kita, orang tersayang, negara, mereka yang telah meninggal dunia, yang sakit, yang menderita, para migran, pemimpin kita, dan dunia agar Allah merangkul mereka dalam cintakasih Allah, atau adakah mereka hanya layak menerima "kritikan-kritikan" kita?"



KEUSKUPAN
MELAKA
JOHOR

www.mjdiocese.my
🌐📱 mjdiocese
📍📱 malaccajohorediocese
caritasmjd.mjdiocese.my
creationjustice.mjdiocese.my



MJD
50
2022

www.lenten.mjdiocese.my
🌐 MJD Lenten